

Nossa historia

(T+M: Mario Pacchioli)

El cor dallas vals nua che l'alva s'entarda
Exist'ina casa da crap e betun.
Naven dil tschalèr tochen si ella mansarda
Eis ella tgemplada da historias e canzuns.
Tuns da muntogna, uclaun e pitgogna,
Tuns dalla patria, da vitg e marcau.
Cusseid' e moderna, faviala materna
D'in pievel che ha da vegl enneu cantau.

**Nossa historia drova in da casa,
In refugi encunter la puorla dil temps.
E sco la flur che sin prada sederasa
Vul nossa historia flurir aunc savens,
Derasar sia vusch, far attents nos affons
Da mirar anavon e ver fidonza els onns.
Senza mai emblidar danunder che vegnin
E perquei drova nossa historia in dacasa ed in destin.**

El cor dallas vals nua che l'alva s'entarda
Subsist'ina casa da crap e betun.
Davos las finiastras fideivlas leu ardan
Las vuschs da nies temps, las vuschs da nos babuns.
Tuns schi sonors, ils tuns da nos c(h)ors.
Tuns da greppaglia, da stuors, ed empau
Melodias festivas ed arias nativas
D'in pievel che ha da vegl enneu sunau.

Nossa historia ...

A quels ch'ein i naven, sur montogna e vi sur mar
Seporscha in ligiom che lai adina regurdar
Vid la vusch dalla patria che fa endament :
« Ti eis maina persuls era sche ti eis lunsch naven ! »
Ed a quels che rumognan a casa a mischun
Sesarva mintga di ina porta o el mund.
E la stiva damenta lu la piazza marcau
Nua ch'ei vegn discutau, giugau e cantau.

Nossa historia ...